

16

T 5422/7671.2



CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JAN 10 1941



THE UNIVERSITY OF CHICAGO  
LIBRARY  
1000 S. EAST ASIAN BLDG.  
CHICAGO, ILL. 60607

白雲集卷之十九

傳

程處士傳

處士姓程名鑑字時舉用伯符仕成于封國下

以為大政留時有桂與許起孤次子獨先封

漢有屋侯無錫有及阿快元景存有元遠

江為新安太守因家新安之黃地據有黃先

國自三司可也



白榆集卷之十九

東海屠隆緯真著

哈佛大學漢和  
圖書館珍藏印

傳

程處士傳

處士姓程名鎖字時啓周伯符仕成王封國于程因  
以爲氏戰國時有程嬰存趙孤次子伯先封任城君  
漢有歷侯黑魏有東阿侯元昱晉有元譚由東阿渡  
江爲新安太守因家新安之黃墩陳有靈洗爲開府  
儀同三司勲名甚著卒謚忠壯廟食黃墩明興有仁



白梅集 卷之十九 乙  
叟字明德者由黃墩徙率東新安里今爲由谿處士  
少竒穎從鄉前輩授詩爲文有藻思同儕推服父客  
死淮海處士蒲伏奔喪遺貲悉沒于人奴復竊橐以  
逃或勸處士追亾而後發不可仁親爲寶奈何緩父  
喪而急長物遂行歸而至不能具饘粥手自畚土葬  
父姚林母復命出偵得奴山東匿貲蕩盡抵淮收責  
屬淮歲大饑盡焚其券垂橐而歸鄉人誅逋者趾錯  
于戶處士鬻田宅脫婦簪珥罄產以償諸責家客曰  
君貧如此所逋多富人盍少需之而償不遺毛髮將

何以卒歲處士謝曰某雖貧刺骨安能逋人責而令  
吾父飲恨下泉償而身啜糜飲水甘之閉戶手一編  
諷誦怨家操挺大詬于門處士爲弗聞人服其度久  
之病作母曰學而輒病四方足餬其口何必匏繫佔  
俾乃結賢宗十人合貲賈吳興已又去賈秣陵已又  
賈溧水家焉新安賈率好鮮衣遊酒家華侈相高處  
士獨不羞寒儉且有心計善策成敗貲遂大起處士  
雖稱賈人子乃喜折節交當世賢豪鉅儒在秣陵日  
從涇縣呂楠增城湛若水兩先生遊講性命之學歲



白梅集 卷之十九  
已邗倭奴內訌吳越騷然先聲且至新都男婦纍纍  
燾山谷處士號于衆曰吾土采阻控上游備禦勢便  
棄祖宗墟墓逃將安逞乎于是倡義三老豪傑度形  
勝據要害結五營營立一勇略者爲長誓師忠壯祠  
下日聚糧繕器訓練爲戰守備而灑其不用命者軍  
中肅然寇聞而遁去不敢犯已而城休寧城溧水處  
士捐千金助工其自奉嗇而赴義豪若此晚營蒐裘  
因巖爲屋雜樹花竹扶踈曰余其倦遊哉是可老矣  
建樓奉母教家童習歌吹旦晚侑食佐驩而與里中

名士陳達甫江民瑩王仲房善詩名日尊每風日佳  
好授簡命觴有翛然人外之想殆賈而且具高人氣韻  
者耶嘗奉詔助工授魯府引禮不拜而仍稱處士也  
伯子問仁仲問學季問策並太學生有俊才與不佞  
爲文字交同入白榆社屠隆曰賈蓋有豪傑焉令鴟  
夷子馬伏波不遇合皮相者亦一賈耳刈葵藿牧雞  
豚志士歎之匹夫起窮巷手致千金手散千金此不  
亦有恢詭歛忽吐欲張弛權術乎充之則提握風雲  
揚搥四海宜其所立辨惟不遇而小用之也程處士



操奇羸人乃一發而建置五營防禦雄略與段紀明  
桓車騎何異且其急喪緩利蒙詬忍辱晚而婆娑山  
園名士文酒其居然幽人標格乎而世之起帖括都  
貴仕朱丹其轂者未必盡若而夫世有玄晏先生寧  
能以彼易此

馬大司徒傳

百滅孫氏稱三不朽古哲人儁士所操至鴻響茂明  
矣千秋萬歲後名與骨俱香者託之竹素也七閩山  
川包絡雲壑周遭靈秀之氣私焉栖霞之士鴻冥駕

時之英龍矯獨大司徒馬最著公之卽世大廷尉  
瑯琊王公元美少司寇長樂鄭公中孚布衣太原王  
君百谷業爲之碑銘三君子當世大賢名士其言足  
不朽司徒公無疑而公子參軍熒雅好不佞言復以  
傳見屬不佞謂古哲人儁士之所以千秋萬歲傳者  
非其人傳神傳也古之君子卽動挾雷霆名揭日月  
要其所繇自豎在其人之性靈胸臆則其大者論人  
不取其大者而好談其一二細事以蹕厲振矜而引  
爲奇節則無爲貴大人之操矣按司徒公宗系世代



詳具諸君子傳志中不佞故可得略而獨稱其大者  
司徒公姓馬氏名森字孔養家于閩鐘山之陽稱鐘  
陽先生其先代有陰德公父贈公驄益淳龐爲長者  
夢鳳鳥之祥生公公少莊凝有志大道聞王文成之  
學于其徒林致之而折衷焉謂近世儒者支離于說  
鈴而罔究性命浮誇於鞶帨而不探本根甚則陽剽  
其名而陰收其利蓋儒之贗者公務削華刻僞而反  
而索之吾心之靈明卽吐爲菁英發爲公業是皆靈  
明一竅所繇出其學如此公登省試上公車報罷肄

業太學首爲大司成魏恭簡公所賞識在太學因得  
盡交天下知名士若歐陽文莊公德鄒文莊公守益  
羅文恭公洪先咸與公講業論心其學大進成進士  
聘校畿輔試所得才賢爲多時信州相國之倩吳生  
者與焉吳生私請介紹謁信州公謝之曰子休矣吾  
以公典得子而以私謁相公朝廷得士之謂何而因  
以爲利不可久之授戶部主事治厰督餉權賈舶九  
江咸以勤幹佐公輸不乏而所至羔羊之節甚厲大  
司徒梁端肅公材雅重公數以公輔期之由郎中出



守太平務長厚敦禮讓與黔首休息間左訟日簡俗  
用還醇至其爲父老請命率持風稜岳岳卽貴勢人  
無所骫骳中消者道出太平濫索徒衆橫甚公以三  
尺裁之璫屏息去尤注意獄情雪寃汰濫常恐不及  
有死獄枉坐公立平反之他郡縣民有頌咸願質成  
于公頌聲大作太平治行爲天下第一遷江西按察  
副使備兵九江九江故太平接壤民向風慕義不令  
而行進按察使山東右轄轉江西左尋擢右副都御  
史宦跡多在江以西恩信殊暢民間甘棠而畏壘之

者無筭入爲少司寇尋改少司徒進大廷尉持法明  
允累平大獄獄有枉濫卽發言盈庭不難以身瀆之  
當其情罪旣得雖萬夫亦不奪也廷中稱平復爲戶  
部右侍郎未幾致仕歸閩再平亂卒鄉人當公聊城  
一矢汾陽單騎不啻過之餘年以荐起自南京工部  
侍郎晉都御史董漕政江准入爲大司徒時 穆廟  
初登極賞額不訾公悉心劑量不乏而又多所裁省  
有詔采滇南寶珠公再疏力止之勸 上清心師儉  
以風庶邦新鄭專恣公累有所匡正格不得行乃乞



身歸侍太夫人養其後江陵淩用事治尚束濕中外  
嗷嗷公居恒仰屋而歎春生秋肅天道以四時成歲  
令國家束濕而治則天道有霜霰爾安所用陽和之  
令哉又恣行胸臆而多慾宣盈敗無日矣公以是絕  
弗與通卽累荐亦不起竟尚羊大王峰下以終公爲  
人寬和坦平中不設城府凡人間世一切是非人我  
榮辱恩怨絕不以一絳其靈臺庶幾抱虛養朴和以  
天倪者邪公微時暴魔夢廣成子飲以刀圭而甦與  
之期待子五十年而遨于太清公友傅汝舟者博學

清曠好道人也數勸公以靈修密締之事公謝不從  
而其忘機塞兌寬然不悶翛然寡營夫寧渠非大道  
要眇本旨哉道函三爲一公謝廣成之名而采廣成  
之實所謂能之而能不爲者非與且公下世距其夢  
時適五十廣成之期不爽矣又寧渠知公之不遨于  
太清邪而公故不廢周孔遺法夫死所以示也公四  
子曰熒曰燮曰焱曰焮熒起任子而左府都事賢而  
有文與余善余故得聞公之大都若此

沈太史傳



沈懋學字君典號少林一號白雲山樵宣城人故侍  
御史古林先生仲子也君典爲人短小閎廓魁偉有  
英雄氣略好陰符黃石機穎絕世平居慕子房長源  
之爲人自束髮交游多天下異人名士酒徒劍客趾  
錯于戶無弗折節延欸者讀書務涉獵多而不精而  
落筆爲詩若文流暢跌宕頃刻千萬言雖精者自以  
爲弗如也人有以窮來歸者不難捐千金畀之苟可  
脫人於阨卽借六尺不辭人稍稍以古俠烈稱焉而  
內行醇備高而不踈博大寬仁要歸于長者識者廼

知其巨人備器非直豪舉已也幼燕之帝所見一大  
殿榜曰雄夫樓殿上多天官女真一如后妃者坐南  
面其餘皆左右侍立或髻而垂綃者或冠而衣緋束  
玉者五彩焜耀爛焉奪目南面者呼一天女下而與  
君典同拜授辭焉覺而心益自負歲丁卯就試秣陵  
秣陵人孫翁女夢一黑龍當門據井詰朝而君典至  
儼居孫翁以他客辭女從後牽翁裾曰夜來兒得竒  
夢此卽君貴不可言大人弗失翁乃留之是歲君典  
得雋南都孫翁遂以女屬焉君典內之如夫人上春



官不第則疋馬走塞下從大將軍往來射獵直遶飛  
狐以北花馬以東縱觀九邊營堡壁壘形勢要害之  
處或與游徼健兒椎牛搗鼓吹觴築作入塞出塞曲  
雜坐酣飲醉則睨胡雛長嘯枕弓刀獨卧沙月之下  
意豁如也居久之廼歸則古林先生已謝世哀毀逾  
禮爲先生卜葬地君典故善郭璞堪輿家言躡草履  
以一奴自隨日行二百里幽巖深谷無處不到而始  
得嘉地葬先生自是君典之名日起客日進家亦益  
貧而重然諾好義不已至其誦法先王明習當世之

務周覽四海貫折三才揣之輒中觸之輒了鑿且可  
用于世而不爲空言臆說卽得之交游閱歷亦不少  
萬曆丁丑復上公車薦南宮奉大對遂魁天下天下  
無論縉紳之士巖居穴處之夫及相人日者博徒賣  
漿者談兵擊劒者莫不以手加額爲朝廷賀得士  
天子命待詔金馬門居無何會江陵相國遭父喪朝  
廷有奪情之命君典語人曰主上毗相國重誠不  
可一日去左右然父死不奔如人子何明王以孝治  
天下不當奪相國情且國家非有兵革之事何情之



可奪相國奔喪是臣荷國厚恩臣而不言誰當言者  
策馬袖一疏將上會有携其疏以去者卒格不得上  
乃始書相國父子百千言反覆諷以大義語甚切至  
相國不從而會有言先後相繼獲罪廷杖君典隕涕  
住視疏語亦稍稍聞君典滋不自安以病告休沐求  
去執政惜其才勉留再三求去益力頃之得請遂飄  
然南歸歸而高卧陵陽敬亭之上擊結煙霞玩弄雲  
月逾年而稍稍出遊白嶽黃山九華沂巖光瀨蹋西  
湖六橋自禦兒港出由拳與不佞相見于五湖之旁

角巾野服所至滅跡收聲亾人識其爲故太史者比  
有物色卽翻焉逸去人望之如五彩卿雲愛之不可  
見見之不可駐踪跡多在名山靈區琳宮蕭寺發而  
爲詩益鉅麗瀟灑讀之飄飄欲僊蓋自是君典之名  
益重于南金北斗而間亦有忌其名者君典謀所以  
少晦微逃于聲色乃忌者卽以聲色短之不佞密以  
語君典曰郭汾陽之自污以位極功高故也子無汾  
陽之功而有相如之累子之自污乃其所以媒謗者  
也君典曰他人僞污吾欲真污人以懋學爲無賴有



昏德甚善吾曰冥冥人曰了了是吾之憂也然君典性亦實微好之云由由拳之婁東謁太原瑯琊兩公會曇陽大師道成爲五陵教主而多所皈依君典口不言而心慕之大師謂太原公曰此人豪爽有氣而性好通脫細謹者多檢押通脫者易擺落慙之切之他日道門儻有一臂之力也及師將化君典從宛上來求教於師師見顧特異臨去師囑之曰無好名無好事寡慾以養身君典受師訓歸益返柔善而不能寡交游簡世緣頗罷于酬應時當路者愛君典才曰

諷之出君典辭不可使者卽其家促就道君典問出處于余余以書勸駕 上待君典厚大恩靡酬卧青山未穩也子房長源皆功成身退訪道名山若卒老崑穴安所稱英雄君典以爲然業治裝將北而病發病且革夢見大師來又見漢壽亭侯過而視病卒不起矣嗟嗟數也奈何丁丑之役不佞北頓轡中都裴徊 高皇帝龍興湯沐邑遙拜陵寢覽觀王氣夜宿逆旅夢謁至尊遇宋張無垢左掖門下握手如平生同謁拜上上親歌湘靈詩送之比傳臚君典名在第



一出相見左掖門下則恍然中都逆旅夢中所見者也而君典故過聽人言一見傾注亦不知其神氣之所以合若亦有數然者久之不佞領穎上出明年君與予告還里及不佞自穎上移吳會而君典來來則不佞方舉一子遂有婚姻之期比同授記于大師則又稱道門之友所關者形骸所不隔者神氣嘗相約事了拂衣挈妻奴携茶竈雞大同入深山若桃源者耦耕學道領清虛於雲中寄逍遙于物外子孫世世爲婚姻比古朱陳以名其村言猶在耳而九京不作

矣君典有子有則少年高才嫻於文辭卽聲標韻肖君典甚無乃君典之所不死者如綫乎計聞遠近哭者無筭獨不佞不哭而爲之賦詩曰新聞喪我良友不哀仰視秋雲浮雲聚散常事不聞人哭浮雲夫人皆有情不佞獨薄乎哉人言君典多交游酬應耗其神氣而又頗不戒于牀第卒以夭其天年是矣然世人有塵緣外擾得失內煎伐性之斧亦復不減日坐火宅十倍君典者而猶幸而獲延君典雖多侵擾而意度常廓如絕無憂愁煩鬱足熬其中其實舒仁愛



白朴集 卷之十九 十一  
又可不死君典甫病四境之人章縫褐博負販乞兒  
咸匍匐走羣望願以身代君典死之日里人踉蹌于  
途曰沈太史死矣蓋宣城爲之罷市無不至其柩前  
長號數聲搏顙而去者卽此固宜挽回神理乃竟不  
免也詎非數哉然竊念疇昔之夢君典固來自帝所  
異物至寶亦帝所急也而大師漢壽亭侯實先後來  
視君典疾卽君典之化而還其故物也惡睹其不然  
哉昧者又或以君典無年疑大師之莫拯中士畜疑  
下士掩口吾道果非耶是何知四大假合形骸非我

人之真我乃在靈明百年何修殤子何短若君典化  
而有悟萬禩猶生如其不然使君典鬢鬢短髮而後  
死何益毫毛以君典才且賢日望其奮出于功烈以  
康濟四海饑寒者待以溫飽煩冤者待以昭蘇沉抑  
者待以拔起鬱塞者待以舒暢智謀勇略懷才抱藝  
之士待以昂首而揚眉一旦溘焉長辭天下驚動當  
其生也四海奔命赴之如雲當其死也六合淒其不  
秋而瑟是遵何德哉嗟君典死可矣伊尹太公顏子  
諸葛孔明咸稱王佐本伊呂之才盡用于天下孔明



用而不盡顏子當其時絲髮莫見所長而後世終不以此定其衡品謂三公果賢于顏氏子也君典卽不用而死惡足沒君典論曰從古英雄豪傑能噴薄日月驅挾風雷駕馭四海奔走區內而不能調其方寸之心君典洵雄豪喜游俠烈道不足以調其心心不足以御其氣比受大師教俠猶未除竟以氣罩宇宙軫轄紛紜外擾其宅內搯其精而以短世惜矣然而顏氏子心齋坐忘終日如愚豈不調其心者而亦不免于夭彼真宰鑪錘固不令物得跳而逃之也必也

瑕瑜不掩則君典之託焉者是其短也宋文丞相天

性豪逸居恒聲伎滿前洎當國難一朝棄妻子如敝

屣英雄烈士其不可料固如此而孔明則終身一黃

髮心境泊然曰鞠躬盡瘁歿而後已是真了性命者

也五丈原之上詎謂其亾者而君典固能爲文丞相

未必能爲孔明嗟嗟爲文丞相亦足吾於君典奚憾乎

孫將軍傳

孫將軍名顯忠錢唐人仕吳越官將軍孝友忠亮歿而爲神宋嘉熙中京尹趙與權禱雨有應上其事勅



護國天澤侯立廟錢塘金沙灘廟中有天澤井語  
在西湖誌中萬曆十一年夏六月不雨杭州守張侯  
振之禱于廟社山川既望乃雨不甚霑足張侯爲人  
仁而勤萬民憂形于色一夕神降于訖自稱爲澤天  
侯孫將軍以生平孝友吾志不欺故歿而爲神尋爲  
純陽聖師所錄署師雲水職次玄宮有年矣夫歲當  
旱雨帝所禁也侯精誠格天帝爲之喜雨可得十之  
三則胡不禱於八盤嶺先照壇黃龍洞及龍井諸處  
且卽日樹雨余小子淪沒已久張侯仁者能爲我一

表章乎惠而好我其妨我六橋之隄是時候不知孫  
將軍何人亦莫知八盤嶺諸處以問左右莫有對者  
乃考湖誌皆有之侯悚然命一屬吏忠篤者物色之  
而信遂徧訪諸處精心默禱具如神指是日果大雨  
如注及訪神廟荒圯矣侯嗟其以嗟卽許爲神表章  
新其廟貌移文監司監司業俞其請後一夕神復來  
謝自敘顛末及廟宇規制甚悉卽其所爲文字亦殊  
宏麗不凡屠隆曰夫神人道邇哉而奈何遠之遠之  
則闇者怠參者肆矣明有人主有辟隸焉冥有上帝



百靈隸焉以分教握符慶賞刑威于是乎出而一切  
置之茫昧杳冥謂悉蔑有也人故敢蔑百靈而莫敢  
蔑帝則獨奈何一孤帝巍然于上哉怠而肆者多行  
凶德昭昭者或漏冥冥者且詰之懼而曰蔑有庶其  
可逃亦愚矣夫其無也不能使之有夫其有也蔑之  
而無乎自古神明僊釋諸書何止百千億萬卷多出  
淹通大儒手傳之至今今所睹一二事輒羣譁而不  
信卽古百千億萬者悉僞作邪又胡信而傳之今也  
余甚習張侯蓋清真有道長者宜其通于神明若是

且侯與左右咸莫測所謂孫將軍與八盤諸處又疇  
爲發之逮其如期而雨雨且霑足抑何翕煜桴鼓也  
余自爲吏無他狀獨于水旱祈禳蒿目焦思靡敢自  
愛而居恒二六時中上帝百神恂恂若有睹者亦往  
往好從人譚鬼神事世疑于癖而余之有不敢爲者  
亦多得其助若孫將軍則甚非夫子之所不語者也

贊

程思玄小像贊

思玄恂恂其人如玉佩蘭與椒郁其芳馥又不含毫



白木集 卷之十九  
書第過目朗散多姿清虛寡慾掃地焚香坐恒盥沐  
芸窓斐几左右紉軸宅我高潔蛻彼穢濁交必名士  
動必遠俗墜勝湘漢采真句曲司馬主盟秬藻雪煜  
余覲函中松飈謾謾長轡未聘胡遽奄速寄礫如棄  
寄寶不宿人之神俊上帝所促嗣輔洗馬是以無祿  
覽君遺照我淚漉漉

沈純甫像贊

萬乘在前臨以白刃仰首信眉龍比未俊邊風如刀  
塵如花黃沙茫茫莽不見家荼邪薺邪子卿同車石

上寶瑟松間綸巾玉妃倚礪戶桃花照通津一石不  
醉長歌送春神情散朗風華映人香山端明兩後身  
丹錄金叟秘記玉牒填胸五車補亡三篋獄瀆來趨  
千秋一睫該中壘之淹通掩司空之博洽夫其形魁  
然其神獨曜乘六氣而沈洋揮八極而不掉夫其形  
可類也其神不可類也

自贊

爾貌清臞而神內腴其文則藻而樸自如流浪四十  
年行類滑稽而心馱雛忘機刻偽世共指以爲愚愚



白柳集 卷之十九 十一  
未必然乃名之曰踈霜降水涸華脫木枯萬緣儻盡  
五嶽可廬人稱爲我我不知其爲吾

跋

跋荆堂銘卷

荆堂者何樹荆於堂也田氏三荆古稱兄弟之好也  
新都程時啓先生生三子伯問仁元方仲問學思玄  
季問策獻甫並挺珪璋之彥馳縹帙之聲孝友篤行  
契叶墳篋樹荆於堂所以識也嗟乎人間世兄弟舞  
象嬉戲徵逐靡不驪然長而授室析著哲婦內啖燕

朋外間持若敵國日尋干戈同氣之謂何慾利蔽於  
靈府物誘牾其真良于鄔之傳閱濟之詩至不忍讀  
程氏三子不忘樹荆之意敦薄俗維衰風其爲河源  
砥柱大矣行義若此文乃足貴不然曹子桓卽麗藻  
絕代君子覽其處東阿王鄴下黃鬚兒事令人臨文  
欲嘔

跋程節婦卷

嗚呼程母之貞縣諸日月嶺南宣城之言亦縣諸日  
月大嶽拳邪海衣帶邪嗟程不死矣余獨惜宣城昨



日爾而此牋儵爲陳迹曹娥之碑山陽之筵兩足然  
跋起信論

我聞修佛者修信心成就夫大道圓明具足如百千  
朗日懸于虛空云何衆生有信有不信信者若以鉛  
磨鏡愈磨愈明不信者若以漆塗鏡漸塗漸黑其說  
有二云何有二衆生自無始以來歷劫轉遷流浪生  
死衆生有雖居流浪中其心常皈向善提若投種於  
地常勤澆灌漸次增長以多生皈向故如來乘其種  
智一點卽破得不退轉地衆生有居流浪中其心常

結縛世緣歷劫不解彌轉彌縛善業日減惡業日增  
距如來覺路若適越北轅入燕南轡彌行彌遠若一  
聞提墮三惡道雖復語以大灑狂而不信纍劫沉滯  
終無悟脫亦可哀矣馬鳴發大慈悲故作此論破邪  
歸正除妄求真去執着返性空離垢溷得清淨以智  
慧治無明以精進治退墮以勇猛治怯弱以平等治  
分別以不礙治攀緣識卽是智舍識無智凡卽是聖  
舍凡無聖從前昏迷回頭卽悟如然慧炬照徹暗處  
如布津梁普度行客苦海盡化蓮臺恒河悉成黃金



善哉馬鳴發此弘願長干義沙門卓錫新安特募善  
緣錢此論以開衆生迷塗汪伯玉司馬龍君善司理  
暨司馬弟仲淹仲嘉咸佛門弟子稱善知識助成勝  
事是故於此生風植菩提種智蓮華會上我見諸公  
頂禮而爲上足

牋紙銘

親朋擇交

青松指心皎日蒞盟鄴呂相賣耳餘交傾欵欵陶陶  
莫可備數管鮑而下此道如土公叔所以著論孝標

爲之太息白衣蒼狗毋以爲金石

平安竹素

臨洮西垂瀟湘南北遼陽十年朔方萬里糜蕪牽恨  
白雲怵悵綺疏閣中流黃機上忽竹素兮遠歸報遊  
子兮無恙蘇卿鐵腸竇家錦心徐淑秦嘉如瑟如琴  
墮竹素兮雲中暢歡樂兮莫任

南花箋

吐廣長舌演微妙詞恒河乾須彌摧天女拱聽龍神  
下馳何實花之盈座焱續紛而離披



白梅集 卷之十九 二  
微波致辭

美東阿之麗藻乃婉變而多情何靈人之委化牽柔  
心于目城睠微波之漲毅紋爰託以代尺素游龍乍  
昂而倏低驚鴻飛而不去生以情始亦以情終苟綢  
繆之相結雖異代兮猶通

江南春信

陽和洩萬物感此華茁疇爲遣使東皇太乙

蕉葉紙

其苗靈其葉青書倒薤扶桑經

邨林一枝

詭名聃然而才至然蔚桂枝之巉巉然夫何對人主  
而沾沾然

三生果

認賊不真蒸砂不熟見在如來過去忍辱有香其舌  
有紺其目北蘇端明識裴相國自無前因安成後果  
居流浪中何者爲我

八行書

開日南通夜郎寄漢陰報河陽鯉魚遺雁足翔征夫



白木集 卷之二十九 十一  
淚思婦腸結綢繆申慨慷忝萬里維八行

三生花

菩提樹優鉢花發弘願見釋迦

竹簡

截瀟湘浦斬篔簹谷制以爲牘書蝌蚪薤粟其羲皇  
之俗耶

五嶽藏書

桐栢霏煙浮丘吐霞靈篇北嶽妙忝西華玄夷蒼水  
應神禹邪岱宗玉牒七十二家我我太史金弢石室

精靈呵護風雨弗蝕有光如虹燭奎壁

博山雲

有雲裊裊其上如結博山乍焚沉水未滅崦送頽陽  
峰吐東月黃庭罷芳磬聲歇

蟠桃三實

崑崙之桃高嶙峋開花結實動三千春朔兒無賴阿  
母噴清虛之上乃有盜僊人

大千春

木有大年人亦有僊彫三光做人挺吾聞之王喬怪



帝城春

栗留鳴澤雉馴衆芳迴柔條新劇駘宿帝城春

富貴春

銅臺歌喧金谷花繁馬嘶南陌火照西園露華零電  
光奔懷哉知止足老氏垂遺言

結蜃樓

欲明欲滅似近似遠瑣窓忽開瑤簾乍捲日昭轉麗  
風吹或斷海神登兮捋紅鬚龍女憑兮搖翠裾何精  
靈之不可究詰句一氣之縹緲而虛無

貝葉牋

種自迦毗移于華壤盡一葉書可周大藏居士得之  
時有佛雲護其上

雜文

適志

何以適志青山白雲何以娛目朝霞夕曛上有長林  
下有迴谿黃麕畫出玄猿夜啼耳聽松風以當管弦  
匡坐大石手汲清泉樂哉山居可以徘徊巖洞陡絕  
豁焉中開竹房內幽石壇外朗有容清言無客獨往



人世隔絕神冥大虛一事關心焚香展書

白榆集卷之二十

東海屠隆緯真著

祭文

祭大廷尉劉公

嗚呼無祿我公之卽世不肖某益有大痛焉往歲某  
在諸生間以薄稅受知長公觀察先生蒙先生國士  
之遇某方坎廩低眉槁容自逃空谷抱影莽蒼而長  
公一朝賜以顏色至其越拘羸破常調絀皮相外驪  
黃收彼爨下拔之泥沙憐才之心明于皦日大都古



人之所難某雖不肖敢忘斯義不肖尋竊一第京師則長公以飛語西及奉頽上之命而長公又北相左也長公詒書某云家有老親朝夕望不佞西西且一伸烏鳥之私卽槁丘壑無恨而我公此時猶疆食促長公北吾家世受國恩所願兒子努力報明主奈何以乃公爲解于是長公北北拜黔中之命獨間關萬里去而不肖某亦自淮蔡移吳會蒼茫奔走不遑寧居吳會又屬大浸吏事如蝟毛而起山川間之不通聞問者兩歲于茲西望廷尉公則烏道陁絕南望觀察先生則溟雲莽互上下寥廓不自知其悲從中來也夫古人以知我之德等於生我某推其所以事長公先生者事我公分義豈淺哉旣不能南問觀察先生又不能西問我公歲之云邁缺然如途之人而公遂長逝矣卒焉震悼其何以勝又傷觀察先生之遭百六也天禍君子外困萋菲內當家難去年喪其愛弟今年喪其尊人天崩地裂一胡慘也某聞而三日哭雖然東土之聞而哭公者繁豈某一夫之私我公嘗爲東諸侯其政寬然長者惠澤滲漉于元元之



白梅集 卷之二 二  
髓至今相距數十年而父老之思劉使君者嘗如一日令若父老輩聞公訃乎東南行爲罷市嗟乎生躋九列歿近百年士佩其教民歌其德已矣我公九京可不憾矣不肖羈于職守不能一修徐孺子生芻之禮僅遣一吏械辭捧帛設椒漿柩下邈棧道於雲中望巴川于天表目與魂俱西靈其鑒之

哭伯兄東山先生文

嗚呼痛哉詎謂今日遂哭我兄也吾家不造三世食貧兄又獨茹其苦自先府君以賈敗室如懸磬兄爲

長嗣力當門戶百憂相煎又遭外侮下持于羣小上困於苛吏內艱於衣食外迫于官租操舟而入海不獲尺鱗而苛吏私征魚租動以百什計家無一錢而誅求不已里中豪又從而魚肉之念一歲間析楊狂狴無虛日某不才雖業文字號稱儒生蕭然裋褐不得志于有司故不爲鄉里所敬無能一出吾兄于困兄墮地六十年憂愁貧苦蓋居其強半伸眉而開顏者百無一日幸而吾兄猶有以自遣雖百憂交于前遇奕而奕遇樗蒲而樗蒲卽釜中生魚爨下無灰不



問也以故居百憂之中六十年而未嘗作一日憂色  
嗟乎夫人有堂堂大尺而生不能得一飽居嘗枵腹  
而猶以奕樗蒲自娛六十年居百憂之中而不作一  
日憂色此其人亦可謂拓落無他腸而仇家日持之  
下苛吏日迫之于上累擯于死逮其晚歲不肖始  
得竊一第補邑小吏兄乃少抒六十年之煩憂而不  
肖爲吏廉奉 國家三尺惟謹小吏之俸不足以飽  
諸兄兄貧猶故也去年兄來省老母于官舍不肖不  
能以祿入潤吾兄而所以事吾兄者不敢缺兄命不

肖譏一言爲壽而不肖云六十貧猶昔無慙廉吏兄  
蓋勉吾兄以安貧守義無以一第故輒改其初不肖  
官雖貧苟小免飢寒而可不當遂有侈心亦且謂吾  
人茹苦良久天將憫其六十年之煩憂而稍遺以晚  
歲之逸樂外侮漸息僅具饘粥庶幾一伸我同氣之  
懷而兄則不待矣嗚呼兄生人間世六十歲而不得  
一朝之歡及弟竊一第庶幾少伸兄眉而兄則不待  
第爲小吏雖貧視之布衣時則有間其俸錢猶足爲  
兄具饘粥原兄之情誠得及見小弱弟叨一第爲一



官卽枵腹如故亡恨奈何遂病而死也六十年憂愁  
貧苦則生而一朝稍足伸眉則死兄之命何其苦哉  
言之痛心淚下不止某與老母一聞兄病日夜懸念  
亟割俸馳歸迎醫僑神猶萬一無恙未幾而竟以計  
聞老母以八十有餘之人而哭吾兄千里之外母旣  
衰暮豈復堪此大哀不肖旣痛吾兄又懼傷老母有  
涕則掩有聲則吞陽勸老母堂上而私哭吾兄室隅  
傷哉茲情苦耶不苦耶嗚呼人生五十不稱夭兄年  
六十爲下壽二子成立婚嫁之事稍具雁行六人猶  
及見最少弟讀書成名而死身後之事則有弟在願  
吾兄無含戚九泉嗚呼痛哉尚饗

祭杜夫人

嗚呼夫人明德朗徹蓮華金掌冷風迴雪執櫛君子  
蘋藻是潔萬里長征一病乃訣踈簾夜空短簫秋咽  
芙蓉香死履綦影滅遊魂何歸三秦陟絕神女騎龍  
姮娥奔月嗟嗟使君心斷涕垂千古沉痛集于雙眉  
空池冷波高木商颺入門抱影朗月鑒之尚饗

祭二陸先生文



遵太湖而頓轡兮覽鉅野於脩岡  
弔先賢之墟墓兮  
藤蘿翳鬱而徬徨時孟冬之玄月兮  
風淒緊而彫傷  
采蒹葭而臨水兮白露下而爲霜  
感華亭之唼鶴兮  
送吾目於雙鴻孤雲莽其起天末兮  
懷二俊于江東  
標朗秀之颯沓兮  
央焉賞鉅麗于司空哀夫  
予之才  
大方遭逢時而多凶洵嘉名之鵠奮兮  
夫何叢蘭之  
敗于秋風牙旗折而鼓音歟兮  
掩雙龍于重泉風沙  
起而晝晦兮  
亮精覓之所宣身佩大將之印兮  
口吐  
鴻儒之鉅言閔四大之缺陷兮  
吾獨嗟美好之難堅

肆袂偷之與鑿齒兮又張羅而彌天  
固犯道家之所  
忌兮亦夫子之尤也  
委去留而無心兮  
菘獨遺此丘  
也  
荆叢祠而薦藻兮揚靈爽於千秋也  
紛木落而艸  
枯兮睇玄雲之若結蒼山空而夜寒兮  
河濺濺而聲  
咽撫長劍而太息兮  
緬想夫子之遺烈尚饗

祭王捕工

嗚呼先生德表鄉閭行高千古  
人日之暮矣蕭然一  
寒官志操彌厲解衣卻金貧士慕義  
清身端範賢者  
所式生平擇地而蹈寡欲保身非自伐  
其生者乃爲



投牒故北方苦寒風雪所侵嬰茲疾膏而東猶以尊  
生有素外枯內腴神氣充然庶幾不歿竟厄大數罔  
以延年余雅高其爲人爲之哭臨盡哀嗟乎善人官  
不逾歲祿不飽孥歿不首丘歿不備禮謂之何哉爲  
善自天性然厚植薄享知先生不恨生而顛顛歿當  
逍遙世俗之所謂福澤君子之所不貪天之予善人  
或不在是又何詰焉嗚呼槃槃一丘誰爲大官滔滔  
古今誰爲長年茫茫九州誰爲故山回也天憲也布  
衣舜也蒼梧之野聖賢豈乏于德哉形束一隅神亡  
不之請歸近延陵之墓而葬焉尚饗

哭君典文

嗚呼君典其生也何爲其天也何爲夫旣生之必有  
以用之生之而夭不如無生雙淚承睫萬恨填胸千  
古留不平之事四海哀黃鳥之詩帝胡可詰也古稱  
龍馬騶虞與丹穴之鳳鍾彼異靈鬱爲上瑞光融顯  
灼流照天壤是皆非偶然也天生君典而卒不得與  
龍馬騶虞丹穴之鳳配美而埒祥生之何爲者哉東  
京之麟天於田父至使識者掩面拭淚而傷焉嗟乎



夫麒麟不夭夭者非麟也而胡爲麟而胡爲天也夫  
其生之而天之如麟何此猶謂周德旣衰不復能守  
此希世之上瑞今帝道方昌 聖明在服而不能有  
一君典何也世固有百不爲多一不爲少天下之生  
久矣往者之沒卽來者之潮土合爲瓦瓦解復爲土  
艾蕭之榮枯也蚊蚋之起滅也歛忽變化莫得端倪  
幻泡空花亦常事爾而惟喪我君典則耀靈無光天  
地黯靈士林蕭條英雄扼腕六合驚動而不止嗚呼  
此可以知我君典矣虎徙則山谷奪色龍亡則大澤

爲空匪空也靈異盡也荒荒宇宙萬物如沙而世終  
不可少此人而天必奪之其夢耶真耶固也靈物異  
寶上帝所珍鬱蕭之上當亦不乏何急而收斯人也  
嗚呼痛哉君典爲人聰明絕世束髮誦讀先王明于  
當世之務個儻好義忠信然諾散千金以周貧不責  
其報捐七尺以赴難不令人知而又立大節敦人倫  
光明潔白表裏洞然豪傑歸心海內延頸無問識不  
識咸歎詫以爲景星卿雲而不登龍門至相語爲不  
比于人數嗟乎有士若此詎獨不可少留之用爲天



下人物楷模而需朝廷一旦緩急耶而天必奪之何也呼天蹋地聲銷影滅九關下鑰蒼虎守之上帝嚴重小臣恐怖而不敢前俯仰躑躅浮雲自馳江河自流嗟我良友今安在也嗚呼吾之哭君非以婚姻以交遊非以交遊以君典非以君典以英雄天道若此則無為生英雄矣吾方欲與君典激昂雲霄共濟巨川勉樹尺寸以報明主席幾蒼蠅之附驥尾而今已矣吾又欲與君典訪赤松于海上捫鴻寶于枕中逍遙五嶽擊結煙霞左提右挈以終踐大道而今已

矣嗚呼痛哉蒼生之卜安石也懶殘之讚鄴侯也天台子微之許太白也希夷先生之相乖崖也百無一驗溘焉長辭而在世世出兩付茫然興言及斯胡得不慘夫黃鵠歿于轂中松桂摧于拱把蘭柔王脆世亦有之乃君典之器不可謂不成而其道不可謂不遇矣公車之文蒙聖天子親擢為第一晨謁丹陛夕拜清華不崇朝而名動天下太阿之芒亦既出匣及其予告而南陵陽片石重于九鼎海內人士仰而奔之不啻百谷之赴滄海也而一旦夭折中道差池



白齋集 卷之二十一 九  
蛾眉罷遣賓客散去昔也孟嘗之車如遊龍今也翟  
公之門可羅雀而使被褐懷王者喪氣於蓬蒿拖紫  
縮金者聚歎於廊廟哀王孫者含悽于南國感知已  
者掩涕於西州嗚呼傷哉詎不痛矣君典英雄人少  
負風雲之氣而不減兒女之情抱管葛經濟之材而  
忽於黃老尊生之道弟嘗舉以規君君謂事了拂衣  
終講性命未晚嗟嗟詎謂其晚矣并以甘竭蘭以香  
焚君之聰明絕世而不察于此豈非命哉嗟嗟良友  
舍我去矣我復何心于人間儻時命有限不得輒相

尋冥冥一瓢一笠請從此始矣沉痛孔極語不復文  
束辭械哀大慟欲絕劍去久矣求之何爲不負下泉  
君典知我如其不知請要上帝而盟之尚饗

祭封公王愛荆先生

嗚呼名山大嶽割截鴻濛頰以深谷陰以長松雲霞  
上結龍子下宮煙焜輪囷戍削龍葱鉅海洪敷日月  
相薄吐納元氣虛空包絡懸而無滯瀾而不涸瀨漾  
混茫之中毓瑤草而產靈藥培塿之上必無茂林蕢  
土之器必無洪音峩峩淨飯乃啓世尊南嶽之生亦



曰陽元有洩必薄有散必屯穆哉封公器博以碩實  
生備人豹姿龍德知幾有道與時消息才大而心小  
洵含靈而匿跡再世醞釀乃挺神人道臻無上泰初  
爲隣千聖是友上帝是賓揭羲和于通塗布寶筏于  
迷津豈曰旁蹊我持者正豈曰爲凡我竇者聖給孤  
苦縣密修顯證諭諭訾訾民之好徑探壁崑丘得珠  
懸流水何注而弗東木何春而弗秋嗟我封公亦又  
何求言念令子毀瘠以楚痛填于胸淚積于土淨明  
忠孝哀固其所我哭以歌不用長號所莫非酒乃擷

谿毛我躬不往我心則勞尚饗

祭御史大夫笠江潘公文

世有達人握造化權塊北爲馬元氣爲鞭應期乘運  
獨立孤騫萬事脫手一往翛然去來無碍維公有焉  
公產五茸山川涵蕩含靈抒采抱德朗暢弱冠登朝  
飈舉雲上敷歷中外江壖海陬時立交戟時蹈神州  
時陪建禮時列爽鳩提戈絕徼擁旄道周所至赫煜  
惠問宣流遂登八座日侍九旂肅寮總憲嶽嶽山丘  
允修罪事中離百憂公也處之暇豫優游氣和而適



志邁而道動若駭電靜若潛虬逮其收之銷聲滅景  
輦路長辭湖山是領遁日月光與煙霞暝蘿戶晝陰  
石牀宵冷神遊紫府名在丹臺松花作釀芝草盈階  
崑崙使去華陽書來簾挂玄圃門掩蓬萊是非兩謝  
胡樂胡哀蕭然一几稱居士家庭幽卻掃逕寂無譁  
惟與海客日營丹砂八十餘年顏如桃花庶幾長生  
留形住世大運莫移暫矣淪逝大化簸弄榮枯相遷  
賢聖皆滅公能不去備柄在我浮漚世諦蔓草飛煙  
中有弗墜往來虛無御風騎氣公乎歸休胡足深涕  
余與公善如蘭如蓀靈爽肅肅儻謂知言蕙殺在俎  
桂酒在尊雲旗獵獵恂恂公竟尚饗

祭馮谿谷封君文

嗚呼茫茫亭毒回薄蜿蜓物有所必化時有所必遷  
奔爲流電蕩爲飛煙聖賢遭之疇其不然從古而有  
我文何言爲有情故哀樂相煎明知其如此而嗟傷  
沈痛卒莫可宣嗚呼先生竟離此屯昨日言笑已爲  
陳人惜也不永天之逸民大樸不削穆乎清真靡翹  
翹而富靡戔戔而貧在市弗喧在坵弗塵長遯丘壑



與煙霞隣乃生異人爲時所寶始登貴仕終踐大道  
公曰天幸乃而翁媪而掩有之神理所害內守其府  
弗盈其外逍遙容與不及于汰時晞丹厓時澡清瀨  
一鑪一茗以爲愉快出聞野叟之論入讀化人之書  
而神澄澄而貌于于庶其禪那與古天竺俱即未至  
乎其至延年又何論乎而胡輒以齒歿爲常縱所憂  
公以齒死公則用柔吾不怛此一化顧獨有疑于靈  
脩嗚呼人生則勞死則暇人之有情爲情所謝卽無  
情者亦無不化公長已矣悠哉泉下仰睇浮雲一哭  
而罷

祭李石菴閣老文

維公江淮靈異南國英爽嶽瀆盤礴元氣濇溱國寶  
物華瑤琨篠簜純德內含神明外朗綵毫淋漓風骨  
道上公車第一振藻揚芬玉洞三秀銅池五雲翱翔  
金華洗洋雄文含香校書薰衣侍燕頰霞朝閣明河  
夜殿遂正秩宗洊司鼎鉉木大心小氣和量虛斟酌  
吐納六合卷舒以登上理淳風穆如寓縣訢訢士也  
瞿瞿相業光顯史不勝書身胥三事神超寥廓黑髮



白木集 卷之二 十一  
懸車遂返初服紫邏入林清池映屋山鳴栗留水飛  
屬玉北海賓朋東山絲竹口謝是非心遺榮辱樂而  
婆娑如鳳如鶴一朝帝念飈車下迎永辭區壤復還  
太清計聞中外天地晝晦至尊震悼父老雪涕國有  
大喪禮崇數異祭葬易名東園秘器自古神人乘理  
去來提日月去躡風雷浮世郵傳海波相推魏公  
紫府都水蓬萊神本不滅化亦何哀某辱真宰鑪錘  
有年方賴寶筏以濟通川典形凋謝中心愴然遠道  
緘辭五情莫宣靈氣肅肅鑒此哀篇尚饗

祭殷文通公文 代作

嗟我岱宗截臬豁豁盪胸决肯亭毒無涯穆哉靈文  
七十二家玉函金簡吐日月華之果截海蓬萊栖霞  
秦漢遺烈蒼茫在邪飛僊神人道高迹遐是誕鉅公  
人倫之彥才諳温肪神情朗散筆含元氣淋漓璀璨  
蚤侍金華黃流玉璫然蒸校書熏衣上殿 穆廟潛  
邸輔導青宮侃侃其論嶽嶽其容養就聖德陶冶八  
紘比登宸極眷注日隆遂由秩宗正位端揆垂紳搢  
笏丹宸累規列星佐商崧高翼姬身胥三事心和天



倪友青羊君赤松雨師乞身盛年濟水之涯雲霄旣  
辭煌震是領有宮半畝有田數頃淥水蒼厓遊筇釣  
艇高躡峻嶒深入幽迥氣合混茫心宅冥濔柱下玄  
虛漆園消搖何理不徹何境不超一朝厭世遊于冥  
寥絳節捫霞金鑣排霧形化神存凌空逕度昔隸玉  
皇今返其處昧者不知謂先朝露官登元輔僊列上  
清古惟誰疋稚圭文成小子寡昧北面先生先生謬  
賞琅玕英英執經講業佩服范型中台忽圻文昌再  
明摧華不注大地震驚曳杖示夢我心怔忡活毛一

奠涕泗沾膺尚饗

戲爲生祭周叔南文

嗚呼叔南竟先鬼逝躍馬氣灰擊劍心死維匣有刃  
維房有矢淹淹下泉一蹶不起曲房長辭玄堂永閉  
風雲滲淡日月飄忽衣弗御而已塵肉未寒而先骨  
號樹間兮蟪蛄悲牀頭兮蟋蟀生時多營歟崎突兀  
追風飛兔摩空爽鶻手摧勁虜足踏溟渤雕龍搏虎  
爲世英物壯圖不成飲恨而歿於戲叔南對酒不能  
飲有客不能歡纖月空墮燭花空寒哀角已盡微鐘



復殘使我仰天而涕廢箸而歎嗚呼爾形頽頽爾氣  
稜稜固將望爾以千秋合速萬里驍騰昨日之日騁  
驂騶于天步今日之日掩狐兔于寒局而使俠士有  
恨英雄無年白壁中斷紅粉早捐三河氣咽六郡心  
憐華堂寶炬散爲荒煙茫茫獵場犁爲墓田天青射  
鴈之野地冷飲馬之泉又何由逐輕車而出塞隨都  
護而臨邊嗚呼運逝必遷物窮乃終何日弗西何水  
弗東秋草罷綠春花披紅嗟夫君之盛年何瞥焉而  
就木形未離于人羣名已登于鬼錄若有人兮山之

阿羗侯子兮水之曲風之生兮蕭蕭靈之來兮蕭蕭  
又安知龍女之晝游彷彿湘靈之夜哭嗚呼世固以  
形存爲存形亾爲亾萬物擾擾亦又何常千秋神王  
馬骨魚腸一朝氣盡西陵北邙君之言笑如故而黯  
焉摧藏以慟哭而代管弦又何必青楓之與白楊

陸太史夫人哀辭

陸太史敬承喪其夫人痛悼而賦神傷太史達士  
賦神傷神可傷乎余爲作哀輓而以曠語終焉  
有美玄娥窈窕連娟來偶喆士相將盛年士也早貴



白木集  
交戟之衷玉版金弢蕙蘭與芷夫人相之蹈道秉禮  
鳧雁宵征雞鳴戒起婉不及媒敬不廢歡以肅以雝  
如蕙如蘭浣濯必親拮据無難備炊未餒擊絮未寒  
士也晏客畜醕治餐士也遠行秣馬裝鞍但見其給  
莫知其端厥德乃並厥情乃深人憐以色我憐以心  
珊瑚爲珥玳瑁爲簪芙蓉羽帳葡萄錦衾百齡無恙  
玉瑟雕琴一朝遷變榮華衰颯花落辭條珠亡去匣  
月冷虹梁雲樓畫閣香奩畫空金鎖夜合鸞鏡在臺  
蛛絲盈篋雕牀綉被儼然空陳御巾衰粉更有何人

衣焚爲灰釵碎爲塵慘不忍見動魄傷神素帷望影  
望不可親有時入夢恂恍非真嗚呼夫君亦孔之哀  
仰天而哭浮雲爲摧入室而歎悲風忽來能傷人

一夕夜臺萬物紛輪往來贍部偶然而合名爲夫婦  
偶然而散如電如露大運行盡去不能顧美則琉璃  
華則彩雲魂消香滅空遺羅裙生游曲房死委荒墳  
千秋萬歲同盡何云死也孰化生也孰造瞥而成合  
瞥而凋耗執而號之爲造物笑恩亦飄風愛亦飄風  
逐情遣累以翔太空



祭張太夫人

穆哉南國代有靈媛女嬃佩蘭樊姬却鮮婉嫺令淑  
女史所賢嗟太夫人明德敬共來賓華胃斧藻是崇  
擷芳采綠曷不肅雖是生令子爲時偉器姿燁其溫  
德冲而粹脫穎惟予學富惟筭服膺五禮明于三事  
婆娑蘭省騰驤罔寺當守是毗民之攸暨母也隨子  
板輿京師出入稟令授之訓辭行業以光人譽颺馳  
穆如清風羔羊素絲國論物望旦暮斗杓均調寓縣  
羽儀清朝胡母夫人華髮是凋鳳車下迎鶴書見招

移家煙島總轡雲霄空棺葬劍永夜聞簫行經鄉山  
漢臯江浦解佩靈妃弄珠神女順風而翔乘霞輕舉  
冷照消搖澹乎容與乃眷令子扶喪而南有涕蘇蘇  
有氣淹淹挂菟荆門照影湘潭悲風入戶冷月在簾  
某等幸忝鷄列于君雁行而母亦母妻其以傷何以  
來哭山尊澗香靈其肅肅鑒此申章

祭戚晚李太傅

西北土厚豁舒奧窔恆嶽中天太華雲表盤爲松栢  
蒸爲雲霞祥鸞威鳳琪樹瑤花其積彌深其出彌廣



峩峩太傅中通外朗純白是守履潔好修山林水碧  
王國天球薦生 聖母母儀天下誕育真人保世滋  
大四海樂康公亦壽祿玉帶緋衣朱邱華屋胡天不  
憇國老告徂蒼皇萬姓奔走通衢 聖母哀號 至  
尊悼愍天柱峰摧大星石竇九重覃恩禮崇數異鼓  
吹羽葆東園秘器龍眠卜葬太山嶙峋銅臺上食玉  
匣是殉形沉神超躡霞排霧喬木初頽兔絲曷附某  
等所用壘焉嗟傷陳辭寫痛桂酒椒漿

白榆集卷之二十

終



我我六傳中通外國純白是守侯  
王國天孫萬生 聖母母儀天下  
大四海樂康公亦壽祿玉帶緋衣朱  
慈國老告但身是萬姓奔走通衢  
尊俸懸天柱輝推大星石寶九重  
吹羽葆東園秘器龍眠上葬太山  
匪是殉形沉神超躡靈律壽春木  
等所用與焉嗟傷陳辭為痛挂酒  
白榆集卷之二











